

mainatges d'òc PLUMALHON

Los satellits

(5,70 €)

ISSN 1264-5733

Minons



La gripa
aviària

Las sèrps d'en çò nòstre

En çò nòstre, la majoritat de las sèrps son pas dangierosas pels òmes perque son de colòbras.

De segur, las colòbras semblan lors cosinas, las vipèras, mas las pòdes destriar pro aisidament.

Las colòbras son pus grandas. La colòbra d'Esculapa, per exemple, pòt mesurar fins a dos mètres de longor. Las colòbras, lor agrada de se solelhar. D'unas que i a escalan als arbres per se pincar sus una branca ont se poirà solelhar. La temperatura de lor còs es cambiadissa e per la far montar, an besonh del solelh.

La colòbra viperina nada fòrt plan. Lo seu reialme es un clòt d'aiga, un pesquièr o un sanhàs ont pòt caçar granhòtas, cabaissòlas e mai qualques peisses. L'apèla viperina a causa del V qu'a sul cap, mas es una colòbra.



Aicí una colòbra verda e jauna que tira la lenga. Aital, aganta las odors.



La colòbra amb colar fa la mòrta quand se sentís amenaçada. En mai, susa una sentor desagradiva per far partir los enemics.



Vipera aspic

Las sèrps pèlmudan



Las sèrps pèrdon la pèl dos o tres còps per an. En creissent, se fan una pèl novèla. Tanplan, en te passejant trobaràs la pèl seca d'una sèrp qu'a pèlmudat.

La vipèra a lo morre un pauc erichat e a lo cap plan diferenciat del còs. A los vistons - la nina de l'uèlh - estirats e verticals, coma los cats. La colòbra los a redonds.

Las vipèras

Son de sèrps verenosas. En çò nòstre, quand una vipèra mordís un òme es pas sovent mortal.


Sustot, cal anar trobar un mètge sul pic.

Lo còs de la vipèra sembla lo de las colòbras. Mas un còp adulta, la vipèra passa pas los setanta centimètres de longor.

La vipèra a dos cròcs dins la boca. Son eles que pòdon injectar lo veren. Las vipèras mordisson perque son suspresas e qu'an paur. Pòt arribar se lor metes las mans dessus sens o voler. La vipèra ataca per se defendre. Quand te vas passejar per camins e caminòls peiruts, carga un parelh de sabatons fòrts e agacha ont metes los pès e las mans.



Colòbra amb colar



Colòbra d'Esculapa

